

Garancite

Neni 21

Garantuesi

1. Kur, në përputhje me dispozitat e këtij ligji, kërkohet dhënia e një garancie, me qëllim që të sigurohet pagesa e një borxhi, kjo garanci depozitohet nga depozituesi i miratuar, dërguesi i regjistruar, pritësi i regjistruar ose nga përfaqësuesi fiskal.
2. Për një borxh, autoritetet doganore mund të kërkojnë vetëm një garanci.

Neni 22

Garancia globale

1. Me kërkesë të depozituesit të miratuar, dërguesit të regjistruar, pritësit të regjistruar/operatorit të regjistruar ose të përfaqësuesit fiskal, autoritetet doganore mund të lejojnë dhënien e një garancie globale për të mbuluar dy ose më shumë veprime, për të cilat ka lindur ose mund të lindë një borxh. Për magazinat fiskale të stokimit garantohej vlera e detyrimit të akcizës për produktin në gjendje stoku, duke u debituar për daljet dhe duke u kredituar për hyrjet.
2. Për magazinat fiskale të prodhimit garantohej vlera mesatare e përlllogaritur e një cikli prodhimi, me të drejtë korrektimi periodik. Tipi i garancisë në këtë rast është garanci globale që nuk debitohej apo kreditohet.
3. Qarkullimi nën pezullim i produkteve të gatshme, me destinacion magazinat fiskale të stokimit, bëhet me garanci të veçantë që debitohej në nisje dhe kreditohet në mbërritje. Ky garantim mund të bëhet nga vetë depozituesi i miratuar ose përfaqësuesi i tij (Agjencia doganore).
4. Qarkullimi nën pezullim i lëndëve të para me destinacion magazinat fiskale të prodhimit garantohej nga garancia globale përkatëse, kur nisësi dhe destinuesi i mallit është i njëjtë.
5. Depozituesit e miratuar të lëndëve të para energjetike duhet të garantojnë akcizën mesatare të llogaritur për produktet që prodhohen me këto lëndë të para. Brenda një viti nga hyrja në fuqi e këtij ligji, Këshilli i Ministrave specifikon kriteret e garancisë globale.

Neni 23

Masa e garancisë

1. Depozituesi i miratuar është i detyruar të depozitojë një garanci deri në masën 100 për qind të detyrimit të akcizës të produkteve të depozituara.
2. Nëse garancia jepet nga subjekte të tjera, shuma e garancisë së dhënë nga depozituesi i miratuar zvogëlohet në të njëjtën shumë.
3. Depozituesit e miratuar, dërguesit e regjistruar, pritësit e regjistruar janë të detyruar të garantojnë në masën 100 për qind detyrimin e akcizës edhe për të gjitha operacionet e tjera me pezullim të detyrimeve të akcizës.
4. Autoriteti doganor ka të drejtë të përjashtojë nga detyrimet e përcaktuara në pikat 1 dhe 2 të këtij neni institucionet buxhetore.

Neni 24

Format e garancisë

Garancia mund të jepet në formën e një:

- a) depozite në të holla;
- b) dorëzanie.

Neni 25

Depozita në të holla

1. Depozita në të holla duhet të bëhet në monedhën zyrtare të Republikës së Shqipërisë.
2. Konsiderohen të barasvlershme me një depozitë në të holla:
 - a) dorëzimi i një çeku, pagesa e të cilit garantohet nga institucioni që e ka lëshuar atë, në çdo mënyrë që quhet e pranueshme për autoritetet doganore;
 - b) dorëzimi i çdo instrumenti tjetër të njohur prej autoriteteve doganore si mënyrë pagese, në bazë të Kodit Doganor.
3. Garancia në formën e një depozite në të holla ose çdo formë pagese e barasvlershme me të jepet në përputhje me dispozitat në fuqi.

Neni 26

Dorëzania

1. Dorëzanësi merr përsipër me shkrim të paguajë personalisht dhe/ose bashkërisht me depozituesin e miratuar, pritësin e regjistruar, dërguesin e regjistruar shumë e borxhit të garantuar që duhet paguar.
2. Dorëzanësi duhet të jetë një person i tretë i vendosur në Republikën e Shqipërisë dhe i pranuar nga autoritetet doganore.
3. Autoritetet doganore mund të refuzojnë miratimin e dorëzanësit ose të llojit të garancisë së propozuar, kur kjo e fundit vlerësohet në bazë të kritereve të përcaktuara me vendim të Këshillit të Ministrave se nuk siguron pagesën e borxhit brenda afatit të përcaktuar.

Neni 27

Zgjedhja e llojit të garancisë

1. Personi, të cilit i kërkohet sigurimi i garancisë, është i lirë të zgjedhë ndërmjet llojeve të garancive, të parashikuara në nenin 24 të këtij ligji.
2. Në përputhje me dispozitat e këtij ligji dhe të akteve nënligjore në zbatim të tij, autoritetet doganore mund të refuzojnë pranimin e llojit të garancisë së propozuar, kur ai është i papajtueshëm me funksionimin e regjimit të produkteve të akcizës. E njëjta procedurë zbatohet edhe për garancinë e propozuar. Autoritetet doganore mund të kërkojnë që lloji i garancisë së zgjedhur të mbahet vetëm për një periudhë të caktuar.

Neni 28

Garancia shtesë

Kur autoritetet doganore gjykojnë se garancia e ofruar nuk siguron ose nuk është më e sigurt ose e mjaftueshme për të siguruar pagesën e një borxhi brenda afatit të caktuar, ato kërkojnë prej depozituesit të miratuar, pritësit të regjistruar, dërguesit të regjistruar ose nga përfaqësuesi fiskal, sipas preferencës së tyre, të sigurojnë një garanci shtesë ose të zëvendësojnë garancinë e mëparshme me një garanci të re.

Neni 29

Çlirimi i garancisë

1. Garancia nuk çlirohet për sa kohë që borxhi, për të cilin kjo garanci është lëshuar, nuk është shlyer ose mund të lindë përsëri. Garancia duhet të çlirohet sapo borxhi shlyhet ose kur nuk mund të lindë përsëri.
2. Kur borxhi shlyhet pjesërisht ose mund të lindë vetëm në lidhje me një pjesë të shumës që është siguruar, me kërkesë të personit të interesuar, çlirohet vetëm pjesa përkatëse e garancisë, me përjashtim të rastit kur shuma në fjalë nuk e justifikon këtë veprim.